

Dienaren ende broederen van verscheyde prouincien so veel gheobtineert dat sij inde substantie des voorgeuens bewillicht ende geconsenteert hebben. Maer want dit wel de aldermeeste swaricheyt is wanneer ende tot welcker plaetse men dit alles op het bequaemste ende sonder perijkel hoe eer hoe beter soude kunnen int werck stellen, so hebben wij wt laste ende beuel des voerseiden Prouinciael Synodus ende der broederen van andere gemeijnten, metten wtgeweken Dienaren ende broederen alhier, die inde voorgestelde propositie bewillicht hebben, so veele vercregen, dat ons bij een yeder natie een persoon gestelt ende begevoecht is geworden, mette welcke wij, om dese sake also gans secreet te houden, vande tyt ende plaetse souden delibereren, ende oock besluyten, namelick waer ende wanneer men dese voerseide algemeyne bijcompste der kercken op het bequaemste soude mogen ten effecte brengen. Welcke bijgeuoechde persoon den tijt ende plaetse niemant anders en soude vercondigen dan den genen die wt syn natie gedeputiert soude werden in dese algemeyne vergaderinge te reysen, ende dat oock niet eer ende voor de tijt der houdinge desselffs nu bij na voor de duer syn soude, om also alle voorvalende peryculen ende verraderije (so de duijuel met syne trawanten toch niet en slaapt) te voorcomen ende euiteeren.

Dewyle wij dan alhier metten voerseiden wt eelcke natie ons bijgeuoechden broederen vanden tijt ende plaetse syn geresolueert, ende wij ons niet anders en kunnen persuaderen of v L. sullen in so een heijlich ende goet voornemen mette andere Dienaren ende broederen van herwaerts ouer oock geerne bewilligen, so heeft het ons niet ongeraden gedacht de selue middelen, om deze sake gans ende so veel het vmmermeer mogelick is secreet te houden, v L. also oock voor te dragen, ende den tyt ende plaetse in desen niet wtdruckelick ofte oopentlick te D nomineeren, dan sulx in desen ingeleyden besloten brief met D geteeckent te specificeren, den welcken v L. nadat sij inde substantie van dese alhier voorgedragene ende geaccordeerde sake sullen bewillicht hebben, v L. Dienaer des woordts der Nederduijtsche gemeijnte te Londen terstonts mogen ouer antwoorden, ten eynde hij de seluige met eenige andere Dienaren ende broederen, so wel der Franchoische als der Nederduijtsche gemeijnten, daer toe ghestelt, sal mogen communiceren, ofte andere Dienaers also besloten ouerseijnde, De welcke den inhouden desselfs dengenen wijders sullen alleen vercondigen die van v L. gedeputeert sullen worden om opte voerseide algemeyne vergaderinge te verschijnen. Tis nu also dat wij alhier van de tyt ende plaetse niet absoluutelick geresolueert souden hebben, indien dese sake so wel in de voorsomer als in de nasomer des tegenwoordigen iaers eerst voorgegeuen ende also verde gebrocht hadde geweest, en connen wel vernemen dat v L. ons sulx niet ten besten hadden mogen affnemen, vermits de mennichte der loffelicke Gemeynnten aldaer florerende ende het getal ende gauen van dese van herwerts ouer maschien verde passeerende; De welcke men in sulcken geual voor eerst hadde moeten besouken, om metten selfden al het geene voerseid is voor alle andere kercken te consulteeren. Maer want dit wt anders geen oorsake en is nagelaten, dan om dat den